



Parlamentarna skupština  
Bosne i Hercegovine



Parlament Federacije  
Bosne i Hercegovine



Narodna skupština  
Republike Srpske



Skupština Brčko Distrikta  
Bosne i Hercegovine

3

## *Bilten o evropskim integracijama parlamenta u Bosni i Hercegovini*

januar - decembar 2019.

Bosna i Hercegovina predala odgovore  
na dodatna pitanja iz Upitnika Evropske komisije

Usvojeno mišljenje Evropske komisije o kandidatskom statusu BiH  
za članstvo u EU

Svečanom ceremonijom otvoren EU tvining projekat podrške parlamentima u BiH

## Zajednička publikacija parlamenata u Bosni i Hercegovini o evropskim integracijama



Parlamentarna skupština  
Bosne i Hercegovine  
Trg BiH 1  
71 000 Sarajevo  
[www.parlament.ba](http://www.parlament.ba)



Narodna skupština  
Republike Srpske  
Trg jasenovačkih žrtava 1  
78 000 Banja Luka  
[www.narodnaskupstinars.net](http://www.narodnaskupstinars.net)



Parlament Federacije  
Bosne i Hercegovine  
Hamdije Kreševljakovića 3  
71 000 Sarajevo  
[www.parlamentfbih.gov.ba](http://www.parlamentfbih.gov.ba)



Skupština Brčko Distrikta  
Bosne i Hercegovine  
Mladena Maglova 2  
76 100 Brčko  
[www.skupstinabd.ba](http://www.skupstinabd.ba)

### Uređivački odbor:

Lejla Tafro-Sefić  
Parlamentarna skupština BiH  
e-mail: lejla.tafro@parlament.ba

Goran Maunaga  
Parlamentarna skupština BiH  
e-mail: goran.maunaga@parlament.ba

Elvira Habota  
Parlament Federacije BiH  
e-mail: elvira.habota@parlamentfbih.gov.ba

Tatjana Lazić  
Parlament Federacije BiH  
e-mail: tana\_lazic@yahoo.com

Andrijana Marjanović  
Narodna skupština Republike Srpske  
e-mail: andrijana.marjanovic@narodnaskupstinars.net

Miroslav Filipović  
Narodna skupština Republike Srpske  
e-mail: miroslav.filipovic@narodnaskupstinars.net

Cvijeta Kovačević  
Skupština Brčko distrikta BiH  
e-mail: cvijetak@skupstinabd.ba

Mihailo Simikić  
Skupština Brčko distrikta BiH  
e-mail: mihailos@skupstinabd.ba

### Lektorica:

Lejla Nuhodžić

### Design/DTP:

Željka Omeragić

Broj: 3

Godina izdanja: 2019.



Poštovana/i

Pred vama je treći broj zajedničkog Biltena o evropskim integracijama parlamenata u Bosni i Hercegovini, koji donosi pregled ključnih događaja i aktivnosti bh. parlamenata u procesu evropskih integracija u posljednjih 12 mjeseci. Ovaj period (januar – decembar 2019) obilježilo je više događaja značajnih za napredak BiH na putu evropskih integracija među kojima je najvažniji usvajanje Rezolucije Evropskog parlamenta o BiH, predaja dodatnih odgovora BiH na Upitnik Evropske komisije i usvajanje Mišljenja Evropske komisije o zahtjevu BiH za članstvo u EU. U širem EU kontekstu došlo je do promjena u temeljnim institucijama Evropske unije održavanjem izbora za Evropski parlament i stupanjem na dužnost novog saziva Evropske komisije s Ursulom von der Leyen na čelu. Održana je i 9. konferencija predsjednika parlamenata zemalja Jugoistočne Evrope na kojoj je usvojena Budimpeštanska izjava o važnosti proširenja EU na zemlje Zapadnog Balkana. Uvjereni smo da će i ovo izdanje Biltena Parlamentarne skupštine Bosne i Hercegovine, Parlamenta Federacije Bosne i Hercegovine, Narodne skupštine Republike Srpske i Skupštine Brčko Distrikta BiH omogućiti da na jednom mjestu dobijete pregled svih aktuelnih događaja vezanih za evropske integracije te da će doprinijeti sveobuhvatnijem informiranju o ovom procesu.

Uređivački odbor

## SADRŽAJ:

U Rezoluciji Evropskog parlamenta o Bosni i Hercegovini za 2018. godinu naglašena potreba za postizanjem dogovora o Poslovniku Parlamentarnog odbora za stabilizaciju i pridruživanje	4
Bosna i Hercegovina predala odgovore na dodatna pitanja iz Upitnika Evropske komisije	4
Usvojeno mišljenje Evropske komisije o kandidatskom statusu BiH za članstvo u EU	5
Održani izbori za Evropski parlament - imenovano novo rukovodstvo u Strazburu	6
Evropski parlament potvrdio novi saziv Evropske komisije	6
Svečanom ceremonijom u Parlamentarnoj skupštini BiH otvoren EU twining projekat podrške parlamentima u BiH u poslovima evropskih integracija	7
Helsinki na čelu Vijeća Evropske unije nastavlja podržavati politiku proširenja na Zapadni Balkan	8
Johan Satler imenovan za novog šefa Delegacije Evropske unije u BiH i specijalnog predstavnika EU u BiH	8
Zaključci Vijeća Evropske unije o Bosni i Hercegovini	9
Evropska unija bez saglasnosti o pitanju proširenja na Zapadni Balkan	9
Održana 9. konferencija predsjednika parlamenata zemalja Jugoistočne Evrope	10
Aktivnosti Parlamentarne skupštine Bosne i Hercegovine	12
Aktivnosti Parlamenta Federacije Bosne i Hercegovine	14
Aktivnosti Narodne skupštine Republike Srpske	16
Aktivnosti Brčko Distrikta Bosne i Hercegovine	18
Najava događaja u vezi s EU u narednom tromjesečju	20
Leksikon termina EU	21

## U Rezoluciji EP o BiH za 2018. godinu naglašena potreba za postizanjem dogovora o Poslovniku Parlamentarnog odbora za stabilizaciju i pridruživanje

*Evropski parlament je 13. februara 2019. usvojio Rezoluciju o Bosni i Hercegovini za 2018. godinu u kojoj je konstatirano da je od sredine 2017. godine u zemlji znatno usporen proces usvajanja reformi povezanih s euointegracijskim ambicijama države BiH.*

Evropski parlamentarci smatraju da je integracija u Evropsku uniju sveobuhvatan proces koji zahtijeva političku volju, zajedničke napore svih učesnika i konsenzus o Reformskoj agendi. Deklarativna predanost evropskom putu mora biti usklađena s dosljednim provođenjem reformi.

U Rezoluciji je izražena zabrinutost u vezi sa i dalje raširenom korupcijom uprkos iskazanoj političkoj volji za borbu protiv nje. Korupcija se, u navodima Rezolucije, reflektirala i na opće izbore, kao i na predizbornu kampanju u kojoj je prevladavala etnonacionalistička retorika usmjerena na pitanja podjela iz prošlosti umjesto na svakodnevne potrebe i načine rješavanja problema s kojima se bosanskohercegovački građani svakodnevno suočavaju.

U vezi sa izborima, u Rezoluciji se poziva na potrebu izmjena postojećih pravnih nedostataka u Izbornom zakonu BiH posebno u oblasti osiguranja zaštite ljudskih prava. Kao preduslov za napredak u integracijskom procesu naglašena je potreba za postizanjem dogovora o Poslovniku Parlamentarnog odbora za stabilizaciju i pridruživanje te istaknut značaj funkcioniranja demokratskih institucija.

U Rezoluciji je izraženo žaljenje zbog izostanka napretka u oblasti slobode izražavanja i nezavisnosti medija. Evropski parlament primjećuje da je postignut određeni napredak u vezi s ekonomskim razvojem i konkurentnošću iako je zemlja još u fazi ranog uspostavljanja funkcionalne tržišne ekonomije. U Rezoluciji se pozitivno ocjenjuju svi napori za uspostavljanjem, održavanjem i razvojem dobrosusjedskih odnosa u regionu te shodno tome i potpisivanje brojnih bilateralnih dokumenata. Posebno je naglašeno da je zahtjev države Bosne i Hercegovine za članstvo u Evropskoj uniji njen strateški izbor te da se on kao takav mora realizirati kroz konkretne rezultate na terenu.

Cijeli tekst Rezolucije Evropskog parlamenta o BiH dostupan na: [https://www.europarl.europa.eu/doceo/document/TA-8-2019-0095\\_EN.html](https://www.europarl.europa.eu/doceo/document/TA-8-2019-0095_EN.html)

## Bosna i Hercegovina predala odgovore na dodatna pitanja iz Upitnika EK

*Predsjedavajući Predsjedništva Bosne i Hercegovine Milorad Dodik uručio je 4. marta 2019. u Briselu dodatne odgovore na pitanja iz Upitnika Evropske komisije potpredsjednici Evropske komisije i visokoj predstavnici Evropske unije za vanjske poslove i sigurnosnu politiku Federiki Mogerini i komesaru za susjedsku politiku i pregovore o proširenju Johanesu Hanu.*

Bosanskohercegovačke institucije završile su odgovore na dodatnih 655 pitanja iz Upitnika Evropske komisije koji su utvrđeni i usaglašeni u tijelima mehanizma koordinacije, a usvojeni na vanrednoj sjednici Vijeća ministara 24. februara 2019. zajedno s Informacijom o tehničkoj finalizaciji odgovora.

Odgovore na dodatna pitanja zatražila je Evropska komisija 20. juna 2018. radi pojašnjenja odgovora na prvobitnih 3.242 pitanja iz Upitnika, te uključivanje podataka iz 2017. godine koji ranije nisu mogli biti prikupljeni. Najveći broj pitanja odnosno se na Politički kriterij (106), poglavlje 14. Transportna politika (38), poglavlje 19. Socijalna politika i zapošljavanje (43), poglavlje 24. Pravda, sloboda i sigurnost (36), te Ekonomski kriterij (33). Ukupno je odgovoreno na 3.897. pitanja, a svi odgovori dati su na 23 hiljade stranica, na njih je odgovaralo 1.500 državnih službenika koji su bili podijeljeni u 35 grupa. Odgovaranje na dodatna pitanja dio je cjelokupnog procesa koji ima za cilj pripremu



mišljenja o kandidatskom statusu BiH za članstvo u Evropskoj uniji, a u kojem će Evropska komisija sačiniti detaljnu analizu stanja u zemlji i procjenu kompatibilnosti sistema BiH sa sistemom i vrijednostima koje postoje u Evropskoj uniji i njenim članicama, te dati ocjenu spremnosti države BiH da pređe u narednu fazu odnosa s EU.

## Usvojeno mišljenje Evropske komisije o kandidatskom statusu BiH za članstvo u EU

Komesar za evropsku susjedsku politiku i proširenje Johannes Han predstavio je 29. maja 2019. Izvještaj o kandidatskom statusu zemalja za članstvo u Evropsku uniju uključujući i Bosnu i Hercegovinu. U sklopu Izvještaja koji se odnosi na Bosnu i Hercegovinu objavljeno je i Mišljenje o zahtjevu BiH za članstvo u Evropskoj uniji čiji je sastavni dio i Analički izvještaj (Izvještaj dostupan na: <https://europa.ba/wp-content/uploads/2019/06/Analitički-izvještaj-Mišljenje-Komisije-o-zahtjevu-Bosne-i-Hercegovine-za-članstvo-u-Evropskoj-uniji.pdf>)

Evropska komisija smatra da bi se pregovori za pristupanje Bosne i Hercegovine EU trebali otvoriti kada zemlja postigne potreban stepen usklađenosti s kriterijima za članstvo, a posebno s političkim kriterijima iz Kopenhagena kojima se zahtijeva stabilnost institucija koje garantiraju demokratiju i vladavinu prava. Bosna i Hercegovina morat će temeljito poboljšati svoj zakonodavni i institucionalni okvir kako bi se osiguralo ispunjavanje sljedećih ključnih prioriteta:

### Demokratija/ Funkcioniranje

1. Osigurati da se izbori provode u skladu s evropskim standardima tako što će provesti relevantne preporuke OSCE-a/ODIHR-a i Venećanske komisije, osigurati transparentnost finansiranja političkih stranaka i održati lokalne izbore u Mostaru.
2. Osigurati vidljive rezultate kada je u pitanju funkcioniranje mehanizma koordinacije o pitanjima koja se odnose na EU na svim nivoima, uključujući i pripremu i usvajanje nacionalnog programa za usvajanje *acquisa*.
3. Osigurati pravilno funkcioniranje Parlamentarnog odbora za stabilizaciju i pridruživanje.
4. Temeljito unaprijediti institucionalni okvir, uključujući i na ustavnom nivou, kako bi se:
  - a) osigurala pravna sigurnost u smislu podjele nadležnosti između nivoa vlasti;
  - b) uvela klauzula o zamjeni kako bi se državi nakon pristupanja omogućilo privremeno ostvarivanje nadležnosti drugih nivoa vlasti radi sprečavanja i otklanjanja povreda prava EU;
  - c) garantirala nezavisnost pravosuđa, uključujući i njegovu samostalnu instituciju (VSTV);
  - d) reformirao Ustavni sud, uključujući i rješavanje pitanja međunarodnih sudija i osiguralo provođenje njegovih odluka;
  - e) garantirala pravna sigurnost, uključujući i putem uspostavljanja pravosudnog tijela kojem bi bilo povjereno da osigura dosljedno tumačenje prava u cijeloj Bosni i Hercegovini;
  - f) osigurala jednakost i nediskriminacija građana, posebno postupanje prema presudi Evropskog suda za ljudska prava u predmetu Sejdić i Finci;
  - g) osiguralo da su svi organi uprave zaduženi za provođenju *acquisa* zasnovani isključivo na profesionalizmu i da se ukloni pravo veta u procesu donošenja odluka, u skladu s *acquisem*.
5. Preduzeti konkretne korake na unapređenju okruženja pogodnog za pomirenje kako bi se prevazišlo nasljeđe rata.

### Vladavina prava

6. Unaprijediti funkcioniranje pravosuđa usvajanjem novih zakona o Visokom sudskom i tužilačkom vijeću i sudovima BiH u skladu s evropskim standardima.
7. Jačati prevenciju i borbu protiv korupcije i organiziranog kriminala, uključujući i protiv pranja novca i terorizma, prvenstveno putem:
  - a) usvajanja i provođenja propisa o sukobu interesa i zaštiti zabunjivača;

- b) osiguravanja djelotvornog funkcioniranja i koordinacije tijela za borbu protiv korupcije;
  - c) usklađivanja zakonodavstva i jačanje kapaciteta za javne nabavke;
  - d) osiguravanja efikasne saradnje između tijela za provođenje zakona i s tužilaštvima;
  - e) demonstriranja napretka u ostvarivanju rezultata proaktivnih istraga, potvrđenih optužnica, krivičnog gonjenja i pravosnažnih osuđujućih presuda u predmetima organiziranog kriminala i korupcije, uključujući i one na visokom nivou;
  - f) depolitizacije i restrukturiranja javnih preduzeća i osiguravanja transparentnosti procesa privatizacije.
8. Osigurati efikasnu koordinaciju upravljanja granicama i kapacitetima za upravljanje migracijama na svim nivoima i osigurati funkcioniranje sistema azila.

### Osnovna prava

9. Jačati zaštitu prava svih građana, posebno osiguravanjem provođenja zakona o nediskriminaciji i o rodnoj ravnopravnosti.
10. Osigurati pravo na život i zabranu mučenja, posebno
  - (a) ukidanjem upućivanja na smrtnu kaznu u Ustavu Republike Srpske i
  - (b) imenovanjem nacionalnog mehanizma za prevenciju mučenja i nečovječnog postupanja.
11. Osigurati podsticajno okruženje za civilno društvo, posebno poštujući evropske standarde o slobodi udruživanja i slobodi okupljanja.
12. Garantirati slobodu izražavanja i medija i zaštitu novinara, posebno putem:
  - (a) osiguranja odgovarajućeg sudskog procesuiranja predmeta prijetnji i upotrebe nasilja nad novinarima i medijskim radnicima, i
  - (b) osiguravanja finansijske održivosti sistema javnih RTV servisa.
13. Unaprijediti zaštitu i inkluziju ranjivih grupa, posebno osoba s invaliditetom, djece, LGBTI osoba, pripadnika romske zajednice, pritvorenika, migranata i tražilaca azila, kao i raseljenih lica i izbjeglica s ciljem zatvaranja Aneksa VII. Dejtonskog mirovnog sporazuma.

### Reforma javne uprave

14. Završiti neophodne korake u reformi javne uprave s ciljem unapređenja sveukupnog funkcioniranja javne uprave osiguravanjem profesionalne i depolitizirane državne službe i koordiniranim pristupom u kreiranju politika u cijeloj državi.

Komisija podstiče BiH, na svim nivoima vlasti, da usaglas i realizira socioekonomske reformske mjere, u skladu sa strateškim smjernicama Programa ekonomskih reformi. Također poziva BiH da nastavi regionalnu saradnju i jačanje bilateralnih odnosa sa susjednim državama, uključujući i sklapanje sporazuma o granici i zalaganjem za trajno pomirenje na Zapadnom Balkanu. Komisija preporučuje Vijeću da razmotri Mišljenje i da preduzme aktivnosti u vezi s navedenim ključnim prioritetima nakon formiranja vlasti u BiH. Komisija će pratiti napredak BiH unutar institucionalnog okvira Sporazuma o stabilizaciji i pridruživanju i nastaviti će pružati finansijsku podršku BiH u okviru Instrumenta pretprijetne pomoći. Komisija će podnijeti izvještaj o BiH kao dio Paketa proširenja 2020. godine u kojem će se analizirati provođenje navedenih ključnih prioriteta u svjetlu narednih koraka BiH na putu ka EU.

Cijeli tekst saopćenja Komisije Evropskom parlamentu i Vijeću - Mišljenje Komisije o zahtjevu BiH za članstvo u EU dostupan na: <https://europa.ba/wp-content/uploads/2019/06/Mišljenje-Komisije-o-zahtjevu-Bosne-i-Hercegovina-za-članstvo-u-Evropskoj-uniji.pdf>

## Održani izbori za Evropski parlament - imenovano novo rukovodstvo u Strazburu


Izbori za članove Devetog saziva Evropskog parlamenta u mandatu 2019/2024. održani su od 23. do 26. maja 2019. Portparol Evropskog parlamenta Žom Duš Žilo saopćio je da je izlaznost birača blizu 51% što je najveći procenat od prvih izbora održanih 1979. godine. Na osnovu rezultata izbora, u novom sazivu Evropskog parlamenta formirani su sljedeći poslanički klubovi: Klub poslanika Evropske narodne stranke (hrišćanski demokrati) - 182 poslanička mjesta; S&D - Klub poslanika Progresivnog saveza socijalista i demokrata - 154 poslanička mjesta, ECR - Evropski konzervativci i reformisti - 62 poslanička mjesta, Renew Europe Group - 108 poslaničkih mjesta, GUE/NGL - Konfederalni klub poslanika Ujedinjene evropske ljevice i Nordijske zelene ljevice - 41 poslaničko mjesto, Zeleni/

ESS-Klub poslanika Zelenih/Evropskog slobodnog saveza - 74 poslanička mjesta, Identitet i demokratija - 73 poslanička mjesta i Nezavisni poslanici - 57 poslaničkih mjesta.

Iako su tradicionalne stranke desnog i lijevog centra ostvarile relativno dobre rezultate na izborima u Evropskom parlamentu, one nemaju većinu kao što je to bio slučaj u prethodnim sazivima, a što će dovesti do stvaranja novih koalicija, u prvom redu s predstavnicima partija Zelenih, kako bi se ostvarila prednost u političkom odlučivanju. Rezultati izbora ukazali su i na porast popularnosti krajnje desničarskih i populističkih partija u zemljama članicama EU, ali s još nedovoljnom snagom u konačnom donošenju političkih odluka u Evropskom parlamentu.

Prva plenarna sjednica novog saziva Evropskog parlamenta održana je 2. jula 2019. u Strazburu na kojoj je, u drugom krugu glasanja, za predsjednika ove institucije izabran David Maria Sasoli, kandidat Progresivnog saveza socijalista i demokrata (S&D). Izabrano je i 14 potpredsjednika Evropskog parlamenta te pet kvestora koji su odgovorni za administrativna i finansijska pitanja koja se direktno odnose na poslanike i njihove uslove rada u skladu sa smjernicama predsjedništva Parlamenta.

Evropski parlament: 2019 - 2024.



Klubovi zastupničke u Evropskom parlamentu	Broj mandata	% mandata
EPP - Klub zastupnika Evropske pučke stranke (hrišćanski demokrati)	182	24,23%
S&D - Klub zastupnika Progresivnog saveza socijalista i demokrata u Evropskom parlamentu	154	20,51%
Renew Europe - Renew Europe group	108	14,38%
Zeleni/ESS - Klub zastupnika Zelenih/Evropskog slobodnog saveza	74	9,86%
ID - Identitet i Demokratija	73	9,72%
ECR - Evropski konzervativci i reformisti	62	8,26%
GUE/NGL - Konfederalni klub zastupnika Ujedinjene evropske ljevice i Nordijske zelene ljevice	41	5,46%
NI - Nezavisni zastupnici	57	7,59%



## Evropski parlament potvrdio novi saziv Evropske komisije

Novi saziv Evropskog parlamenta je na sjednici održanoj 16. jula 2019. na prijedlog Evropskog vijeća, imenovao novu predsjednicu Evropske komisije Ursulu fon der Lejen. Evropski parlamentarci su na plenarnom zasjedanju, održanom 27. novembra 2019. glasali za davanje mandata cijelom novom sazivu Evropske komisije. Tim Ursule fon der Lejen podržale su najveće političke grupe u Evropskom parlamentu - Evropska narodna partija, socijaldemokrati i liberali, dok je grupa Zelenih ostala suzdržana. Evropska komisija je, s predsjednicom Ursulom fon der Lejen na čelu, počela svoj petogodišnji mandat 1. decembra 2019.

U novom sastavu Evropske komisije dogovoreno je da će se državama Zapadnog Balkana u kontekstu evropskih integracija baviti dosadašnji ministar vanjskih poslova Kraljevine Španije Žozef Borel, koji je imenovan za visokog predstavnika Evropske unije za vanjsku politiku i sigurnost, što je pozicija koju je do sada obavljala Federika Mogherini.



## Svečanom ceremonijom u Parlamentarnoj skupštini BiH otvoren EU tvinig projekat podrške parlamentima u BiH u poslovima evropskih integracija



U Parlamentarnoj skupštini BiH održana je 27. juna 2019. svečanost otvaranja tvinig projekta Evropske unije pod nazivom "Osnadživanje i nastavak podrške parlamentima u BiH u poslovima evropskih integracija". Ovaj projekat, koji će u naredne dvije godine obuhvatiti Parlamentarnu skupštinu BiH, Parlament Federacije BiH, Narodnu skupštinu Republike Srpske, Skupštinu Brčko Distrikta BiH, kao i skupštine kantona, provest će konzorcij koji će činiti Narodna skupština Mađarske, Parlament Austrije i Hrvatski sabor. U provođenju ovog projekta, vrijednog 2,3 miliona eura, učestvovat će i predstavnici parlamenata Belgije, Češke Republike, Francuske, Portugala i Slovačke, kao i više od 60 eksperata iz država članica Evropske unije.

U obraćanju prisutnima predsjedavajući Doma naroda Parlamentarne skupštine BiH Bakir Izetbegović istakao je ključnu ulogu zakonodavnih organa Bosne i Hercegovine u realizaciji prioriteta i zadataka koje su pred našu zemlju postavljeni u nedavno objavljenom Mišljenju o zahtjevu BiH za članstvo u Evropskoj uniji. Predsjedavajući Izetbegović poručio je da će se Parlamentarna skupština BiH u narednom periodu snažno fokusirati na dvije vrste zadataka - osiguravanje djelotvorne prakse i pravila za usklađivanje zakonodavstva sa zakonodavstvom EU i uspostavljanje snažnog političkog nadzora nad cjelokupnim procesom evropskih integracija BiH. Naglašavajući značaj provođenja ovog projekta, Izetbegović je rekao da će iskustva zakonodavnih institucija Mađarske, Austrije i Hrvatske biti dragocjena za sve parlamente u BiH, a posebno za Parlamentarnu skupštinu BiH kao najvišu zakonodavnu instituciju naše države.

U vezi s ulogom entitetskih parlamenata u ovom tvinig projektu govorili su predsjedavajući Predstavničkog doma Parlamenta Federacije BiH Elvir Karajbić i potpredsjednica Narodne skupštine Republike Srpske Sonja Karadžić Jovičević. Predsjedavajući Karajbić izrazio je zahvalnost predstavnicima EU i podršku tvinig projektu, spremnost i opredijeljenost Predstavničkog doma kada je riječ o evropskom putu BiH s ciljem ubrzanja procesa integriranja naše zemlje u EU.

U obraćanju prisutnima potpredsjednica Karadžić Jovičević rekla je da je sada sasvim jasno da proces evropskih integracija nije vlasništvo samo jednog nivoa vlasti. Ona je istakla da disperzija ovog procesa na entitetske i kantonalne parlamente pokazuje da proces evropskih integracija pripada i njima, ali što je najvažnije i svim građanima BiH. Kazala je da je Narodna skupština Republike Srpske preuzela veći dio preporuka prethodnih tvinig projekata i uključila ih u novi Poslovnik o radu, koji je usvojen prije dvije godine. "Također, Narodna skupština Republike Srpske ostaje privržena svojoj ulozi u pružanju podrške institucijama Republike Srpske u procesu pridruživanja BiH Evropskoj uniji", naglasila je Sonja Karadžić Jovičević.

Prisutnima su se tokom svečanosti obratili i zamjenik predsjednika Narodne skupštine Mađarske Ištvan Jakab, predsjednik stalne Potkomisije za evropske poslove Nacionalnog savjeta Parlamenta Austrije Reinhold Lopatka, predsjednik Komisije za evropske poslove Saveznog savjeta Parlamenta Austrije Kristian Buhman i predsjednik Komisije za evropske poslove Hrvatskog sabora Domagoj Ivan Milošević, koji su naglasili da će te zemlje nastaviti snažno podržavati Bosnu i Hercegovinu na putu ka Evropskoj uniji, kao i da će timovi stručnjaka ovih zemalja u okviru tvinig projekta podrške parlamentima u BiH prenijeti iskustva i standarde u izvršavanju poslova u vezi s procesom evropskih integracija.

Šef Sekcije Operacija za pravosuđe i unutrašnje poslove i reformu javne uprave u Delegaciji Evropske unije u BiH Nikolas Bizel rekao je da su odnosi BiH i EU ušli u intenzivniju fazu, te naglasio značaj tvinig projekta u uspostavljanju bliskih odnosa i kontakata između parlamenata u BiH i parlamenata država članica EU.

Ovo je treći tvinig projekat koji Evropska unija provodi u parlamentima u BiH. Prethodni projekti rezultirali su potpisivanjem Mehanizma saradnje parlamenata u BiH u poslovima evropskih integracija i formiranjem posebnih jedinica EU u sekretarijatima parlamenata sa zadatkom nastavka komunikacije i saradnje sa institucijama EU, kao i nastavkom provođenja EU projekata u parlamentima u BiH.

## Helsinki na čelu Vijeća EU nastavlja podržavati politiku proširenja na Zapadni Balkan

Nakon što je predsjedavanje Vijećem Evropske unije pripalo Finskoj 1. jula 2019, finški premijer Antti Rine je u Evropskom parlamentu, prilikom predstavljanja aktivnosti predsjedavanja Vijećem, najavio da će ova zemlja nastaviti podržavati politiku proširenja na Zapadni Balkan. Zvaničan stav Finske o pitanju politike proširenja Evropske unije prema zemljama Zapadnog Balkana potvrdio je i komesar za evropsku susjedsku politiku i pregovore o proširenju Johannes Han ističući da prioritetni smjer finskog političkog djelovanja proističe iz dugoročnih ciljeva i zajedničkog programa Rumunije, Finske i Hrvatske koje se rotiraju na dužnosti predsjedavanja Vijećem EU svakih šest mjeseci u periodu od 1. januara 2019. do 30. juna 2020. godine, te na osnovu kojih se pripremaju pojedinačni detaljni šestomjesečni programi predsjedavanja Vijećem.

U svom obraćanju evropskim parlamentarcima finški premijer istakao je da su glavni prioriteti finskog predsjedavanja Vijećem Evropske unije promocija globalnog liderstva Evropske unije u borbi protiv klimatskih promjena, jačanje vladavine prava u Evropi, te konkurentnija

i socijalno osjetljivija Evropska unija. Osim toga, Rine je istakao da će Finska raditi na većoj konkurentnosti Evropske unije, jačanju jedinstvenog tržišta, promociji slobodne trgovine i korištenju potencijala koje pružaju istraživanja, razvoj, inovacije i digitalizacija. Kako bi se povećao broj kvalificiranih radnika, neophodno je povećati broj žena na tržištu rada, a što podrazumijeva da Evropska unija i države članice nastave promovirati ravnopravnost spolova u poslovnom životu, te u skladu s tim unapređuju politike javnog zdravlja i poboljšavaju uslove rada. „Budućnost Unije trebala bi biti socijalno, ekonomski i ekološki održiva Evropa“, rekao je finški premijer naglasivši da slogan finskog predsjedavanja Vijećem jasno izražava taj cilj - *Održiva Evropa, održiva budućnost*. Kao jedan od važnih prioriteta kojem će Finska pridati posebnu pažnju predstavljaju hibridne prijetnje i drugi sigurnosni izazovi.

Nakon Finske, predsjedavanje Vijećem EU preuzima Hrvatska 1. januara 2020.

(više informacija na:

<https://um.fi/council-of-europe-finlands-presidency-2018-2019>)

## Johan Satler imenovan za novog šefa Delegacije Evropske unije u BiH i specijalnog predstavnika EU u BiH

Vijeće Evropske unije imenovalo je ambasadora Johana Satlera na dužnost specijalnog predstavnika EU u BiH i šefa Delegacije EU u BiH, koji je 1. septembra 2019. preuzeo ovu dužnost od švedskog diplomate Larsa-Gunara Vigemarka. Satlerov mandat zasniva se na ciljevima politike Evropske unije u BiH, a to su: stalni napredak u procesu stabilizacije i pridruživanja, osiguravanje stabilne, održive, mirne, multietničke i ujedinjene zemlje koja mirno saraduje sa svojim susjedima te osiguranje da zemlja ide naprijed prema članstvu u Uniji nakon objave Mišljenja Komisije o zahtjevu Bosne i Hercegovine za članstvo u EU.

Iz biografije Johana Satlera saznajemo da je diplomirao i magistrirao političke nauke i slavenske jezike na Univerzitetu u Innsbuku 1994. godine, te je završio postdiplomski studij iz naprednih međunarodnih studija na Univerzitetu u Beču 2008. godine. Tokom dosadašnjeg iskustva ambasador Satler posebno se fokusirao na Zapadni Balkan. U Ministarstvu vanjskih poslova Austrije počeo je raditi 1996. u Odjelu za ljudska prava. Posmatračkoj misiji Evropske zajednice priključuje se 1997. godine, u sklopu koje biva angažiran u Sarajevu i Tirani. Nakon toga radio je kao šef Odjela za Zapadni Balkan pri Direkciji za istočnu i jugoistočnu Evropu u Ministarstvu vanjskih poslova Austrije. U Albaniji je preuzeo ambasadorsku dužnost 2016. godine. Rođen je 1969. godine u Austriji. Osim maternjeg njemačkog jezika, ambasador Satler tečno govori engleski i ruski, te poznaje bosanski/hrvatski/srpski i albanski jezik.

Više informacija na: <https://www.consilium.europa.eu/media/40475/curriculum-vitae-johann-sattler.pdf>



## Romeo Franc novi šef Delegacije Evropskog parlamenta za odnose s BiH i Kosovom

Nijemac Romeo Franc, poslanik stranke Zeleni, imenovan je 26. septembra za novog šefa Delegacije Evropskog parlamenta za odnose s Bosnom i Hercegovinom i Kosovom. Francu je to drugi mandat u Evropskom parlamentu, a na novoj funkciji naslijedio je hrvatskog evroparlamentarca Tonina Piculu. Kao predsjedavajući ove delegacije Franc će ko-predsjedavati Parlamentarnim odborom za stabilizaciju i pridruživanje (POSP), dok će drugi kopredsjedavajući biti iz Parlamentarne skupštine BiH.

POSP, koji čini isti broj članova Evropskog parlamenta i članova Parlamentarne skupštine BiH, predstavlja zajednički instrument Evropskog parlamenta i Parlamentarne skupštine BiH za provođenje parlamentarne dimenzije Sporazuma o stabilizaciji i pridruživanju, te je njegovo uspostavljanje obaveza Bosne i Hercegovine iz SSP-a. Konstituiran je na zajedničkoj sjednici članova Delegacije Evropskog parlamenta za odnose s BiH i Kosovom i članova Zajedničke komisije za evropske integracije PSBiH u Sarajevu početkom novembra 2015. godine, ali faktički nikada nije profunkcionirao.

## Imenovani novi specijalni izvjestilac Evropskog parlamenta za BiH i novi komesar za proširenje EU

Portugalac Paulo Rangel izabran je 22. oktobra za novog specijalnog izvjestioca Evropskog parlamenta za Bosnu i Hercegovinu, a na toj dužnosti naslijedio je Cristiana Dan Predu. Rangel je član Evropskog parlamenta od 2009. godine i jedan je od potpredsjednika Evropske narodne stranke. Dužnost specijalnog izvjestioca veoma je važna za BiH u institucijama EU, jer se njegovi izvještaji uglavnom usvajaju u najvišoj evropskoj zakonodavnoj instituciji.

Također, evropski poslanici u Vanjskopolitičkom odboru Evropskog parlamenta potvrdili su 18. novembra imenovanje Olivera Varhelyia za novog evropskog komesara za proširenje i politiku susjedstva, koji ovu dužnost preuzima od Johannes Hana. Varhelyi je u svom obraćanju

Evropskom parlamentu kazao da je pridruživanje zemalja Zapadnog Balkana Evropskoj uniji jedan od prioriteta, te mu je cilj da bar jedna zemlja sa Zapadnog Balkana postane članica EU do kraja njegovog petogodišnjeg mandata. Govoreći o Bosni i Hercegovini, kazao je da je naša zemlja napravila određene pomake na svom evropskom putu, naglašavajući hitnost reforme pravosuđa, kao i rješavanje migrantske krize. Varhelyi je potvrdio da će Evropska komisija početkom 2020. predstaviti sugestije za proces pridruživanja kako bi se ojačao pregovarački proces. Za prioritete zemalja Zapadnog Balkana naveo je borbu protiv korupcije i ekonomski razvoj. Varhelyi je po struci pravnik i pretodno je obavljao dužnost mađarskog ambasadora u EU.



## Zaključci Vijeća Evropske unije o Bosni i Hercegovini

Vijeće Evropske unije donijelo je na zasjedanju održanom 14. oktobra 2019. četiri zaključka o Bosni i Hercegovini:

1. Vijeće ponovo ističe svoju nedvosmislenu predanost evropskoj perspektivi Bosne i Hercegovine kao jedinstvene, ujedinjene i suverene zemlje. Uzimajući u obzir da od prošlogodišnjih općih izbora u Bosni i Hercegovini još nisu formirane vlade na državnom i nivou Federacije BiH, Vijeće ponavlja svoj poziv Bosni i Hercegovini da u interesu svih građana bez daljnjeg odgađanja nastavi osnivanje i rad vlada. Vijeće podsjeća na to da je za napredak na putu prema EU potrebno efikasno provesti reforme. Osim toga, Vijeće podsjeća na zaključke iz juna 2019. godine, u kojima je primljeno na znanje Mišljenje Evropske komisije.
2. Vijeće pozdravlja nastavak operacije Altea, koja je nakon strateških preispitivanja 2017. i 2019. ponovo usmjerena na svoj glavni mandat, pri čemu je kolektivno osposobljavanje ostao jedan od njenih zadataka. U tom kontekstu, kao dio ukupne strategije EU za Bosnu i Hercegovinu, Vijeće potvrđuje spremnost EU da u ovoj fazi nastavi

provoditi izvršni mandat operacije Altea u pružanju podrške vlastima Bosne i Hercegovine da očuvaju sigurno i zaštićeno okruženje pod obnovljenim mandatom UN-a.

3. Vijeće sa zanimanjem očekuje predstavljanje sljedećeg strateškog preispitivanja u 2021. godini kao temelja za rasprave s državama članicama o zadacima EUFOR-a i opcijama za budućnost operacije, imajući pritom na umu potrebu za podržavanjem napretka Bosne i Hercegovine u procesu integracije u EU i uzimajući u obzir sigurnosno stanje na terenu.
4. Vijeće prepoznaje važnost daljnje koordinacije operacije EUFOR-a Altea s drugim međunarodnim akterima na terenu. EU istovremeno i dalje podstiče vlasti Bosne i Hercegovine da, uz podršku međunarodne zajednice, ubrzaju svoje napore usmjerene na zbrinjavanje viška municije, oružja i eksplozivnih naprava te na deminiranje.

Zaključci su dostupni na: <http://europa.ba/?p=66070>, a korišten je prijevod Delegacije EU u BiH.

## Evropska unija bez saglasnosti o pitanju proširenja na Zapadni Balkan

*Pitanje o proširenju država Zapadnog Balkana odgođeno je do maja 2020. godine kada će se o njemu raspravljati na Samitu EU - Zapadni Balkan u Zagrebu.*

O otvaranju pristupnih pregovora sa Sjevernom Makedonijom i Albanijom razgovaralo se na sastanku ministara vanjskih poslova Evropske unije u Luksemburgu i na Samitu šefova država i vlada Evropske unije u Briselu. Zaključeno je da se rasprava o ovom pitanju, kao i dogovor o budućoj evropskoj perspektivi Zapadnog Balkana odgodi do proljeća 2020. godine.

Na sastanku ministara vanjskih poslova Evropske unije, održanom 15. oktobra 2019. u Luksemburgu, zemlje članice nisu uspjele postići saglasnost u vezi s otvaranjem pristupnih pregovora sa Sjevernom Makedonijom i Albanijom. Neusvajanje zajedničkih zaključaka posljedica je stava francuskog predsjednika Emanuela Makrona koji je stavio veto na bilo kakvu odluku o proširenju dok se u cjelini ponovo ne preispita sam pregovarački proces. Francuska je, naime, zatražila da pristup prema procesu proširenja treba biti još oštriji, a ključni element je promjena, odnosno revizija metodologije o tome kako će se pregovori odvijati. Između ostalog, predviđa se i mogućnost nazatka u pregovorima ako zemlje koje pregovaraju ne pokažu konkretan napredak u neophodnim reformama, sa posebnim naglaskom na vladavinu prava. Od Evropske komisije Francuska je zatražila da do marta 2020. izradi strategiju s konkretnim prijedlozima za provođenje ove nove metodologije, kao i da izvjesti o stvarnoj primjeni reformi u svakoj zemlji koja je u procesu proširenja.

O pitanju proširenja država Zapadnog Balkana razgovaralo se i na Samitu šefova država i vlada Evropske unije, održanom u Briselu 17. i 18. oktobra 2019, a na prijedlog Donalda Tuska, predsjednika Evropskog vijeća. Iako je većina zemalja članica bila za to da se donese pozitivna odluka o otvaranju pristupnih pregovora sa Sjevernom Makedonijom i Albanijom, ipak nije došlo do usaglašavanja jedinstvenog stava zbog



ponovnog odbijanja Francuske da se ovo pitanje razmatra, odnosno protivljenja Danske, Holandije i Španije da se pristupni pregovori otvore za Albaniju. Zemlje članice su stoga pokušale da razmotre i opciju razdvajanja početka pristupnih pregovora, odnosno da se pozitivan signal uputi Sjevernoj Makedoniji, ali je Francuska i tom prilikom ostala na poziciji da obje zemlje nisu ispunile uslove za početak pregovora, te da se cijeli proces pregovaranja treba reformirati prije nastavka integracija zemalja koje teže da postanu punopravne članice Evropske unije. Predsjednik Evropskog parlamenta David-Maria Sasoli izrazio je žaljenje zbog odluke koja je donesena na najvišem političkom tijelu EU, ali i dao ohrabrenje i podršku evropskoj perspektivi Zapadnog Balkana zajedno s Johanesom Hanom, komesarom EU za susjedsku politiku i pregovore o proširenju, koji je, također, ostao pri stavu da evropska integracija Zapadnog Balkana i dalje ostaje važna strateška politika Unije. U usvojenom zaključku Evropskog vijeća o pitanju proširenja ističe se da će ovo pitanje biti ponovo razmotreno prije sastanka na vrhu EU i zemalja Zapadnog Balkana u Zagrebu u maju 2020. godine.

(svi usvojeni zaključci sa sastanka Evropskog vijeća dostupni su na: <https://www.consilium.europa.eu/media/41134/17-18-euco-final-conclusions-hr.pdf>)

## Tonino Picula imenovan za izvjestioca Evropskog parlamenta za Zapadni Balkan

Hrvatski europarlamentarac Tonino Picula imenovan je 27. novembra 2019. za izvjestioca Evropskog parlamenta za preporuke o Zapadnom Balkanu. Njegova uloga će, kako se navodi, biti izrada preporuka Evropskog parlamenta Evropskom vijeću i Evropskoj komisiji, s ciljem otvaranja pristupnih pregovora sa Sjevernom Makedonijom i Albanijom i davanja novog zamaha procesu proširenja. Jedna od glavnih tema i izazova kojima će se Picula baviti u ovom izvještaju bit će pronalaženje konsenzusa u Evropskom vijeću, a u pogledu procesa širenja na zemlje Zapadnog Balkana.

## Održana 9. konferencija predsjednika parlamenata zemalja Jugoistočne Evrope

### Predsjednici parlamenata zemalja Jugoistočne Evrope i Višegradske grupe u Budimpešti potpisali Izjavu o proširenju Evropske unije



Deveta konferencija predsjednika parlamenata zemalja Jugoistočne Evrope, koju svake druge godine organizira Narodna skupština Mađarske, održana je 4. novembra 2019. u Budimpešti. Tema ovogodišnje konferencije bila je politika proširenja Evropske unije.

Konferenciji je, u ime entiteta Federacija BiH, prisustvovao predsjedavajući Predstavničkog doma Parlamenta Federacije BiH Mirsad Zaimović, a u ime entiteta Republika Srpska, predsjednik Narodne skupštine RS-a Nedeljko Čubrilović. U radu konferencije učestvovali su i predsjednici regionalnih parlamenata Albanije, Crne Gore, Češke, Poljske, Sjeverne Makedonije, Slovačke, Srbije i Vojvodine.

Konferenciju je otvorio predsjednik Narodne skupštine Mađarske Laslo Kover i premijer Viktor Orban. Predsjednik Kover ponovio je spremnost Mađarske da pruži podršku i pomoć BiH na njenom putu ka Evropskoj uniji.

Tokom konferencije prezentirani su izvještaji zemalja članica Višegradske grupe koju je premijer Orban ocijenio kao najuspješniju političku formaciju u Evropskoj uniji.

Na konferenciji je usvojena i Budimpeštanska izjava o proširenju EU kojom predsjednici parlamenata naglašavaju važnost proširenja Evropske unije i zalaganje za pristup pružanja mogućnosti svakoj državi regije da napreduje, na osnovu vlastitih zasluga, s krajnjim ciljem da postane članica EU. U Izjavi je skrenuta pažnja šefovima država članica na činjenicu da je ključ uspjeha i prosperiteta EU jasno opredje-

ljenje sadržano u članu 49. Ugovora o Evropskoj uniji koji kaže da se sve evropske države mogu pridružiti EU pod uslovom da dijele iste vrijednosti. "Politika proširenja bila je jedna od najuspješnijih politika EU. Evropska unija treba da ostane otvorena prema onim zemljama koje dijele zajedničke vrijednosti koje su u osnovi EU i spremne su da se prilagode njenim standardima. Stoga se mora ojačati ova politika, koja je, nažalost, usporena nakon posljednjeg sastanka Evropskog vijeća", istaknuto je u izjavi. "Pristupanje država Jugoistočne Evrope Evropskoj uniji, dodaje se, ne samo da utiče na sigurnost, stabilnost i prosperitet samog regiona već i na cijeli kontinent. Predsjednici smatraju da je historijska greška to što se na posljednjem sastanku Evropskog vijeća nije mogla donijeti odluka o početku pregovora o pristupanju s dvije zemlje kandidatkinje koje su ispunile tražene uslove", piše u Izjavi. Predsjednici pozivaju političke lidere država članica EU da učine sve što mogu kako bi što prije donijeli odluku o početku pregovora o pristupanju s Albanijom i Sjevernom Makedonijom.

Predsjednici parlamenata pozvali su predsjednika Narodne skupštine Mađarske da Izjavu prosljedi predsjedniku Evropskog vijeća, predsjedavajućem Vijeća EU, predsjednicima Evropskog parlamenta i Evropske komisije, kao i svim predsjednicima nacionalnih parlamenata država članica Evropske unije.

Tekst Budimpeštanske izjave možete pogledati na:

<https://predstavnickidom-pfbih.gov.ba/bs/page.php?id=2052>

## Okrugli sto na visokom nivou o procesu evropskih integracija Zapadnog Balkana u Briselu

### Vrata Evropske unije ostaju otvorena za BiH

Predsjedavajuća Kluba hrvatskog naroda u Domu naroda PSBiH Lidija Bradara i predsjedavajući Kluba bošnjačkog naroda u Domu naroda PSBiH Asim Sarajlić učestvovali su 3. i 4. decembra 2019. u Briselu na okruglom stolu o procesu evropskih integracija Zapadnog Balkana i na sastanku članova Odbora za vanjske poslove Evropskog parlamenta (AFET) s delegacijama parlamenata država članica Evropske unije i zemalja Zapadnog Balkana.

Okrugli sto, koji je organizirao AFET, uvodnim izlaganjem otvorio je predsjednik Evropskog parlamenta David-Maria Sasoli, koji je, potvrđujući evropsku perspektivu zemalja regiona, naglasio da je za Evropski parlament vrlo bitno da se nastavi proces pristupnih pregovora s državama Zapadnog Balkana.

Učesnicima sastanka obratio se visoki predstavnik EU za vanjske poslove i sigurnosnu politiku Josep Borel, koji je pružio punu podršku evropskoj perspektivi i nastavku procesa proširenja EU na zemlje Zapadnog Balkana.

Prema riječima Borela, Zapadnom Balkanu ne može se uskratiti evropska perspektiva, budući da, kako je rekao, mir i sigurnost u ovom regionu istovremeno znače i mir i sigurnost u EU. Parlamentarcima je poručio je da ne budu razočarani najnovijim dešavanjima unutar EU u vezi s procesom proširenja, te da nastave provođenje reformi i ispunjavanje uslova za punopravno članstvo u EU.

Bradara je izrazila nadu da će novo Vijeće ministara BiH biti imenovano do kraja decembra. Istakla je apsolutnu predanost svih ključnih političkih faktora u BiH evropskoj perspektivi i procesu evropskih integracija, te se zahvalila čelnicima Evropskog



parlamenta i drugih institucija EU na dugogodišnjoj prijateljskoj podršci i interesiranju koje iskazuju za evropsku perspektivu i budućnost BiH.

U diskusiji o trenutnim izazovima i izgledima za proširenje EU u budućnosti, evropski zvaničnici poručili su da su vrata za integraciju BiH u EU otvorena. Istovremeno, oni su pozvali na uspostavljanje vlasti u BiH na svim nivoima bez ikakvih uslovljavanja i odgađanja, te naglasili da očekuju nastavak reformi i provođenje preporuka iz Mišljenja Evropske komisije.

U radu okruglog stola učestvovao je i novoimenovani komesar EU za susjedstvo i proširenje Oliver Varhelji, kao i predsjedavajući Radne grupe AFET-a za Zapadni Balkan Tonino Picula.

## Zvaničnici EU: Imenovanje Vijeća ministara otvara put za napredak Bosne i Hercegovine

Nakon što je Predstavnički dom Parlamentarne skupštine BiH 23. decembra 2019. potvrdio imenovanje članova Vijeća ministara BiH, evropski komesar za proširenje Oliver Varhelji i visoki predstavnik EU Josep Borel objavili su zajedničko saopćenje u kojem su pozdravili donošenje ove odluke.

U saopćenju je navedeno kako imenovanje Vijeća ministara BiH otvara put za obnavljanje opredjeljenja političkih stranaka da omoguće napredak zemlje na putu ka Evropskoj uniji.

-Naglašavamo hitnost angažmana koji vlada na državnom nivou treba da provede kako bi definirali, usvojili i proveli novi paket socijalnih i ekonomskih reformi u korist države i njenih građana. Budući napredak zahtijeva punu posvećenost zakonodavne i izvršne vlasti na svim nivoima - dodaje se u saopćenju.

Također je navedeno da je ovo odlučujući trenutak u odnosima između Evropske unije i Bosne i Hercegovine nakon prihvatanja Mišljenja Komisije i njenih 14 ključnih prioriteta u oblastima vladavine prava, osnovnih prava i reforme javne uprave.

-Predstojeća 2020. bit će važna godina za Bosnu i Hercegovinu zbog održavanja lokalnih izbora, uključujući i Mostar - naglasili su Varhelji i Borel.



## Studijska posjeta Hrvatskom saboru

U okviru tving projekta "Podrška Evropske unije parlamentima Bosne i Hercegovine u poslovima evropskih integracija" 3. i 4. decembra 2019. održana je studijska posjeta Hrvatskom saboru kojoj su prisustvovali zaposleni u Parlamentarnoj skupštini Bosne i Hercegovine, Parlamentu Federacije Bosne i Hercegovine, Narodne skupštine Republike Srpske i Skupštine Brčko Distrikta Bosne i Hercegovine.

Cilj posjete bio je da se osoblje parlamentarnih jedinica za evropske integracije upozna s poslovima sličnih jedinica odgovornih za koordi-

naciju poslova vezanih za Evropsku uniju. Tom prilikom predstavljena im je organizacija i rad Ureda za međunarodne i evropske poslove te Odbora za evropske poslove Hrvatskog sabora. Tokom studijske posjete organiziran je i sastanak u Ministarstvu vanjskih i evropskih poslova Republike Hrvatske, u okviru kojeg je prezentiran rad Sektora za COREPER I, Sektora za evropsko pravo te Službe za države u procesu pristupanja EU i Službe za kandidate i potencijalne kandidate za EU, a poseban akcenat stavljen je na hrvatsko predsjedavanje EU.

## Krišto, Špirić i Sobotka podržali učešće zvaničnika Austrije u tvining projektu

Zamjenica predsjedavajućeg Predstavničkog doma Parlamentarne skupštine BiH Borjana Krišto i zamjenik predsjedavajućeg Doma naroda PSBiH Nikola Špirić razgovarali su u Strazburu 25. oktobra 2019. s predsjednikom Nacionalnog vijeća Republike Austrije Wolfgangom Sobotkom. Tokom susreta izraženo je obostrano zadovoljstvo odličnom saradnjom parlamenata iz BiH i Austrije. S tim u vezi obje strane podržale su učešće zvaničnika Nacionalnog vijeća Austrije u provođenju tvining projekta „Osnaživanje i nastavak podrške parlamentima u BiH u poslovima evropskih integracija“. Sobotka je naglasio da će njegova zemlja nastaviti da pruža snažnu podršku procesu evropskih integracija, uprkos, kako je rekao, činjenici da se Francuska i još neke evropske zemlje protive nastavku procesa proširenja EU. Najavljujući da će Nacionalno vijeće Austrije početkom naredne godine organizirati veliku konferenciju posvećenu izazovima u procesu proširenja EU, Sobotka je uputio poziv najvišim zvaničnicima PSBiH da učestvuju u radu te konferencije, što su zamjenici predsjedavajućih oba doma PSBiH prihvatili. Susret je održan na marginama Evropske konferencije predsjednika parlamenata zemalja članica Vijeća Evrope.



## Članovi kolegija oba doma Parlamentarne skupštine BiH primili u nastupnu posjetu Johana Satlera



Predsjedavajući Predstavničkog doma Parlamentarne skupštine BiH Denis Zvizdić i njegovi zamjenici Nebojša Radmanović i Borjana Krišto, te predsjedavajući Doma naroda PSBiH Bakir Izetbegović i njegovi zamjenici Dragan Čović i Nikola Špirić primili su 3. oktobra i 27. septembra 2019. u odvojenim posjetama novoimenovanog šefa Delegacije Evropske unije u Bosni i Hercegovini i specijalnog predstavnika EU u BiH ambasadora Johana Satlera.

Tokom susreta Zvizdić je istakao da politički odnosi još uvijek nisu takvi da se može postići dogovor o sazivanju sjednice tog doma. Radmanović je naglasio da, pored dobre želje, EU treba da pruži konkretniju pomoć BiH jer mu se, kako je rekao, nekada čini da te pomoći nema, što podstiče skepticizam građana prema EU. Rekao je i da BiH ispunjava sve više uslova ali da je u Evropi sve više onih koji nisu naklonjeni proširenju EU zbog čega bi bilo bitno da EU ima snažniji pristup prema BiH. Krišto je ukazala na činjenicu da je BiH država tri konstitutivna naroda te da je kao predstavnica hrvatskog naroda dužna apelirati da treba više da se radi na provođenju odluka domaćih i međunarodnih sudova koje će značiti jednakopravnost svih u našoj zemlji.



Članovi Kolegija Doma naroda PSBiH upoznali su Satlera s različitim viđenjima uzroka zastoja u formiranju Vijeća ministara BiH i parlamentarnih tijela. Tokom razgovora zajednički je ocijenjeno da je za BiH veoma važno formiranje i rad organa izvršne i zakonodavne vlasti na osnovu općih izbora 2018. na svim nivoima. Vezano za evropski put BiH, ocijenjeno je da je povoljna okolnost to što on uživa povjerenje većine stanovnika BiH. Istaknuto je i da bi trebalo stvarati uslove za izradu akcionog plana za realizaciju prioriteta iz Mišljenja Evropske komisije a to, kako je rekao ambasador Satler, podrazumijeva i da nakon četiri godine zastoja profunkcionira Parlamentarni odbor za stabilizaciju i pridruživanje kao zajednički forum za razmjenu stavova poslanika Evropskog parlamenta i zakonodavne vlasti BiH. Satler je podsjetio na 14 ključnih prioriteta iz Mišljenja Evropske komisije o zahtjevu BiH za članstvo u EU, te dodao da će jedan od njegovih prioriteta biti rad na akcionom planu na njihovom ispunjenju. Spomenuo je i ratifikaciju paketa državnog programu IPA 2018 za BiH, kao i ratifikaciju Konvencije o uzajamnoj administrativnoj pomoći u poreskim pitanjima. Članovima kolegija oba doma PSBiH uručen Izvještaj Evropske komisije za BiH.

## Pozitivno mišljenje Evropske komisije predstavlja prekretnicu u odnosima BiH i EU

Predsjedavajući Doma naroda PSBiH Bakir Izetbegović, predsjedavajuća Predstavničkog doma PSBiH Borjana Krišto i zamjenik predsjedavajućeg Doma naroda PSBiH Nikola Špirić primili su 29. maja 2019. šefa Delegacije i visokog predstavnika Evropske unije u BiH ambasadora Larsa – Gunara Vigemarka, koji im je uručio Mišljenje Evropske komisije o zahtjevu Bosne i Hercegovine za dobivanje statusa kandidata za članstvo u EU. Ističući kako pozitivno Mišljenje Evropske komisije predstavlja ključni trenutak i prekretnicu u odnosima BiH i EU, ambasador Vigemark naglasio je da će zvaničnici Delegacije EU u BiH biti na raspolaganju domaćim

institucijama za svaku vrstu podrške i pomoći u ispunjavanju preporuka iz Mišljenja Evropske komisije, posebno u pogledu usklađivanja domaćeg zakonodavstva sa zakonodavstvom EU. Zahvaljujući se Evropskoj komisiji, ambasadoru Vigemarku i predstavnicima Delegacije EU u BiH na doprinosu u postizanju napretka BiH na putu ka EU, članovi kolegija oba doma PSBiH ocijenili su da Mišljenje Evropske komisije predstavlja razlog za optimizam i podstrek za ispunjavanje preporuka i za provođenje reformi s ciljem što skorijeg otvaranja pregovora o članstvu BiH u EU.

## Poslanici iz Predstavničkog doma PSBiH na 15. konferenciji COSAP-a

Delegacija Parlamentarne skupštine BiH, u kojoj su bili poslanici u Predstavničkom domu PSBiH: Halid Genjac, Vojin Mitrović i Mijo Matanović, učestvovala je na 15. konferenciji parlamentarnih komisija za evropske integracije zemalja Procesu stabilizacije i pridruživanja jugoistočne Evrope (COSAP) koja je 14. i 15. aprila održana u Beogradu. Konferencija, koju je organizirao Odbor za evropske integracije Narodne skup-

štine Republike Srbije, okupila je učesnike iz Bosne i Hercegovine, Srbije, Albanije, Sjeverne Makedonije, Crne Gore, Bugarske i Rumunije, koji su na dva panela razmijenili iskustva i mišljenja o značaju interparlamentarne i regionalne saradnje za ubravanje reformi u procesu pridruživanja EU i o saradnji parlamenata sa civilnim društvom u procesu evropskih integracija.

## Borjana Krišto na Konferenciji predsjednika parlamenata EU

Predsjedavajuća Predstavničkog doma Parlamentarne skupštine BiH Borjana Krišto učestvovala je 9. aprila 2019. u Beču na Konferenciji predsjednika parlamenata Evropske unije. Na Konferenciji, koja je održana u okviru parlamentarne dimenzije austrijskog predsjedavanja Vijećem EU, razgovarano je o procesu proširenja EU i daljnjoj podršci EU zemljama Zapadnog Balkana u procesu evropskih integracija.

Tokom sesije pod nazivom "Evropska unija i njeni susjedi" u svom obraćanju predsjedavajuća Krišto naglasila je važnost pokretanja reformskog procesa u BiH, jer se upravo vlastitim reformskim mjerama postavlja tempo integracije u EU. Također je istaknula da su svi u BiH, pored izazova s kojima se susreću, ipak jedinstveni u stavu da je budućnost naše zemlje u članstvu u Evropskoj uniji. Predsjedavajuća Krišto naglasila je i to da je, što se tiče proširenja EU na zemlje jugoistočne Evrope, to više proces konsolidacije evropske teritorije nego što je proces proširenja.

## Članovi Radne grupe Vijeća EU dva puta u Parlamentarnoj skupštini BiH Naredne četiri godine ključne za proces evropskih integracija BiH

Članovi Radne grupe Vijeća Evropske unije za region Zapadnog Balkana (COWEB) boravili su dva puta u radnoj posjeti BiH tokom kojih su posjetili Parlamentarnu skupštinu BiH 21. marta, a zatim i 1. jula 2019.

Tokom prve posjete članove COWEB-a primili su predsjedavajući Doma naroda PSBiH Bakir Izetbegović, zamjenik predsjedavajućeg Doma naroda Nikola Špirić i poslanik u Predstavničkom domu PSBiH Nikola Lovrinović.

Predstavnici ovog radnog tijela EU, predvođeni šefom Delegacije i specijalnim predstavnikom EU u BiH ambasadorom Larsom – Gunarom Vigemarkom, interesirali su se za proces formiranja

vlasti u BiH, za prioritete novog saziva PSBiH u procesu evropskih integracija, za pitanja poput procesa pomirenja, iskorjenjivanja jezika mržnje, te pitanja obrazovanja vezano za problem dvije škole pod jednim krovom. Ističući da su naredne četiri godine ključne za proces evropskih integracija BiH, naglašena je važnost aktivne uloge PSBiH u tom procesu. S tim u vezi, ambasador Vigemark i eksperti EU rekli su da bi bilo potrebno da novi saziv PSBiH riješi pitanje funkcioniranja Parlamentarnog odbora za stabilizaciju i pridruživanje.

Zahvaljujući se na podršci koju države članice EU pružaju BiH u procesu evropskih integracija, predstavnici PSBiH apostrofirali su činjenicu da u vezi s ovim procesom postoji konsenzus svih političkih subjekata u BiH. Odgovarajući na pitanja evropskih zvaničnika i eksperata, predstavnici PSBiH upozorili su da se BiH suočava s odlaskom mladih ljudi iz zemlje, kao i s novim talasom migrantske krize, te zatražili pomoć institucija EU u rješavanju ova dva krupna problema.

Članovi Radne grupe Vijeća EU za Zapadni Balkan tokom druge posjete Parlamentarnoj skupštini BiH susreli su se s predsjedavajućim Kluba bošnjačkog naroda u Domu naroda PSBiH Asimom Sarajlićem, predsjedavajućim Kluba srpskog naroda u Domu naroda PSBiH Sredojem Novićem i zamjenikom predsjedavajuće Kluba hrvatskog naroda u Domu naroda PSBiH Barišom Čolakom. Tokom razgovora, u kojem je učestvovao i šef Delegacije i specijalni predstavnik EU u BiH ambasador Lars - Gunar Vigemark, razmijenjeni su stavovi o daljnjem toku procesa evropskih integracija BiH. Članovi delegacije PSBiH istakli su da je dobivanje statusa kandidata za ulazak u EU jedno od najvažnijih pitanja za BiH. Ambasadori COWEB-a naglasili su da najnovije Mišljenje Evropske komisije predstavlja prekretnicu u odnosima BiH i EU, te potvrdu napretka BiH u procesu evropskih integracija.



## Radionica o usklađivanju zakona i izradi propisa u okviru tvinig projekta EU

U Parlamentu Federacije BiH 28. oktobra 2019. održana je radionica o usklađivanju zakona i izradi propisa u okviru tvinig projekta EU "Osnaživanje i daljnja podrška parlamentima u BiH u poslovima evropskih integracija". Radionica je bila fokusirana na praktične aspekte usklađivanja domaćeg prava s pravnom tečevinom EU kroz pregledavanja Nacrta zakona o zaštiti zraka. Ekspert tvinig projekta na ovoj radionici bila je Sofia Čoma, stručna savjetnica Narodne skupštine Mađarske, a kojoj su prisustvovali zaposlenici Stručne službe Doma naroda, Stručne službe Predstavničkog doma i Zajedničke službe Parlamenta Federacije BiH.



## Šef Delegacije EU u BiH Johan Satler u nastupnim posjetama Predstavničkom domu i Domu naroda Parlamenta Federacije BiH



Predsjedavajući Predstavničkog doma Parlamenta Federacije BiH Mirsad Zaimović primio je 6. oktobra 2019. u nastupnu posjetu šefa Delegacije EU u BiH i specijalnog predstavnika u EU ambasadora Johana Satlera. Razgovaralo se o aktuelnim političkim pitanjima s naglaskom na nastavak socioekonomskih reformi i što brže formiranje vlasti i na nivou Federacije BiH i na državnom nivou.

Predsjedavajući Zaimović izvijestio je ambasadora Satlera o budućim aktivnostima Predstavničkog doma Parlamenta Federacije BiH i planiranim sjednicama, te kompletiranju rukovodstva na nekoj od narednih sjednica Doma. Razgovarano je i o tvinig projektima koji se provode u parlamentima BiH te značaju uspostavljanja Odjela za evropske integracije oba doma Parlamenta FBiH. U toku razgovora naglašena je i neupitnost evropske perspektive BiH kada je riječ o EU i NATO-u, što je ujedno bio i zajednički stav. Osim navedenog, razgovaralo se i o mi-

grantskoj krizi i načinima njenog rješavanja, u što moraju biti uključeni svi nivoi vlasti.

U nastupnu posjetu koja je upriličena 8. oktobra 2019. predsjedavajući Doma naroda Parlamenta Federacije BiH Tomislav Martinović primio je novoimenovanog šefa Delegacije EU u BiH ambasadora Satlera. U ovoj nastupnoj posjeti razmijenjena su mišljenja o aktuelnoj političkoj situaciji, nužnoj uspostavi Vijeća ministara BiH, ali i o budućnosti države Bosne i Hercegovine. „Bosna i Hercegovina je dio Evrope i hrvatski narod je jasno orijentiran ka Briselu. Svi naši dosadašnji napori bili su usmjereni ka dokazivanju jasne opredijeljenosti za evropske integracije“, istakao je predsjedavajući Martinović. Ambasador Satler je i ovom prilikom izrazio opredijeljenost za pomoć Bosni i Hercegovini na njenom evropskom putu i ispunjavanju obaveza koje su preduslov članstvu u EU.

## Početak tvinig projekta EU u Parlamentu Federacije BiH

U Parlamentu Federacije BiH ozvaničen je 14. maja 2019. početak tvinig projekta pod nazivom "Osnaživanje i daljnja podrška parlamentima u BiH u poslovima evropskih integracija".

Sastanci s predstavnicima Delegacije Evropske unije i timom tvinig projekta EU, čije će provođenje voditi Narodna skupština Mađarske, Parlament Austrije i Sabor Republike Hrvatske, održani su posebno s Kolegijem Predstavničkog doma i Kolegijem Doma naroda Parlamenta Federacije BiH.

Glavni cilj projekta je jačanje parlamenata u BiH i međuparlamentarne saradnje, a posebno administrativnih jedinica zaduženih za zadat-

ke EU. Ovom prilikom posebno je naglašena važnost uspostavljanja odjela za EU u federalnom parlamentu.

Implementatori projekta su također predstavili četiri komponente od kojih se projekat sastoji: jačanje kapaciteta odjela za EU, jačanje saradnje između parlamenata u BiH po pitanjima vezanim za EU, pravno usklađivanje i uključivanje kantonalnih skupština, gdje je uloga federalnog parlamenta posebno naglašena. Osim prezentiranja svrhe i ciljeva projekta, istaknuta je snažna podrška političkog rukovodstva zemalja iz kojih dolaze implementatori, čiji je strateški cilj da sve zemlje Zapadnog Balkana budu dio EU i evropskih integracionih procesa.

## Održana tematska sjednica Predstavničkog doma "Izazovi i perspektive Federacije BiH na evropskom putu"



Tanja Fajon, članica Evropskog parlamenta iz Slovenije, boravila je 26. juna 2018. u posjeti Parlamentu Federacije BiH, a tim povodom održan je sastanak zakonodavne i izvršne vlasti i tematska sjednica u Predstavničkom domu "Izazovi i perspektive Federacije BiH u evropskim integracijama". Sastanku, čiji je domaćin bio predsjedavajući Predstavničkog doma Parlamenta Federacije BiH Edin Mušić, prisustvovali su: Lidija Bradara, predsjedavajuća Doma naroda, zamjenici predsjedavajućih oba doma Mladen Bošković i Jasenko Tufekčić, Fadil Novalić, premijer Federacije BiH, Jelka Miličević, zamjenica federalnog premijera i ministrica finansija, Melika Mahmutbegović, potpredsjednica Federacije BiH, ambasador Lars-Gunar Vigemark, šef Delegacije EU u BiH i specijalni predstavnik EU u BiH, te Edin Dilberović, direktor Direkcije za evropske integracije BiH.

Na sastanku se razgovaralo o aktuelnom stanju u Federaciji BiH, ostvarenom napretku, evropskoj perspektivi i obavezama Federacije BiH, ali i svim otvorenim pitanjima koja opterećuju Federaciju BiH i njen evropski put. Rukovodstvo zakonodavne i izvršne vlasti u Federaciji BiH informiralo je poslanicu Fajon i ambasadora Vigemarka da je Federacija BiH, uprkos složenim političkim prilikama, zahvaljujući dobroj saradnji Parlamenta i Vlade, realizirala 67% aktivnosti iz Reformske agende.

Poslanica Evropskog parlamenta Fajon i ambasador Vigemark obratili su se i na tematskoj sjednici Predstavničkog doma pod nazivom "Izazovi i perspektive Federacije BiH na evropskom putu" te istakli neizmjernu važnost ove sjednice, koja do sada o ovoj temi nije nikada bila održana ni na državnom ni na entitetskom zakonodavnom nivou. "Uvjerena sam da je za BiH jedino rješenje Evropska unija. BiH nam je potrebna i nadam se da će se taj dijalog vlasti s Evropskom komisijom nastaviti ubrzanim tempom i možda s više motivacije", kazala je Fajon i dodala da će poruke koje je danas čula ponijeti u Brisel, gdje će se nastaviti zalagati za proširenje na BiH. Na sjednici su se također obratili i direktor Direkcije za evropske integracije BiH Edin Dilberović, direktor Ureda Vlade FBiH za evropske integracije Vjekoslav Čamber i profesorica na Fakultetu političkih nauka Nedžma Džananović Miraščija.

Predsjedavajući Mušić zahvalio se evropskoj parlamentarki Fajon na njenom nesebičnom zalaganju ne samo za ukidanje viza i zabrane na osnovno ljudsko pravo i osjećaj slobode, već i njenom kontinuiranom angažmanu za priključenje naše zemlje u EU. Predstavnički dom je, na kraju sjednice, svojim zaključcima potvrdio dosadašnje opredjeljenje da BiH nastavi na svom putu ka evropskim integracijama i punopravnom članstvu BiH u EU i NATO-u.



## **Predsjednik Čubrilović razgovarao sa šefom Delegacije EU u BiH o Mišljenju Evropske komisije o zahtjevu BiH za dobivanje kandidatskog statusa za članstvo u EU**

### **Snažna podrška Narodne skupštine Republike Srpske evropskom putu**



Predsjednik Narodne skupštine Republike Srpske Nedeljko Čubrilović razgovarao je 6. juna 2019. u Banjoj Luci sa šefom Delegacije Evropske unije u Bosni i Hercegovini ambasadorom Larsom-Gunarom Vigemarkom o Mišljenju Evropske komisije o zahtjevu BiH za dobivanje kandidatskog statusa za članstvo u Evropskoj uniji.

Predsjednik Čubrilović je tokom susreta istakao da je Republika Srpska odlučna i spremna da provodi reforme radi ubrzanja evropskog puta, ali da ne može da pristane na rješenja koja bi u tom procesu dovela do nepotrebnog prijenosa nadležnosti.

Komentirajući preporuke Evropske komisije o problemima u pravosuđu, predsjednik Čubrilović istakao je da je potrebno prvo riješiti pitanje odlaska stranih sudija iz Ustavnog suda BiH, jer to nema nijedna država Evropske unije. Kada je riječ o problemu funkcioniranja različitih nivoa vlasti u BiH, o kojima se također govori u preporukama Evropske komisije, Čubrilović je rekao da je neophodno insistirati na primjeni mehanizma koordinacije i sve eventualne reforme i izmjene propisa bazirati u okviru ovog mehanizma.

Sastanku su prisustvovali potpredsjednici Narodne skupštine Republike Srpske Milan Petković i Senad Bratić, kao i članovi skupštinskog Odbora za evropske integracije i regionalnu saradnju.

Podsjećamo, predstavnici Delegacije EU u Bosni i Hercegovini 29. maja 2019. uručili su rukovodstvu Narodne skupštine Republike Srpske i članovima Odbora za evropske integracije i regionalnu saradnju pozitivno Mišljenje Evropske komisije o aplikaciji BiH za status kandidata za članstvo u EU i Analitički izvještaj.

U ime Narodne skupštine dokumenti su uručeni potpredsjednicima parlamenta Sonji Karadžić Jovičević i Milanu Petkoviću. Potpredsjednica Sonja Karadžić Jovičević istakla je opredijeljenost Republike Srpske za evropske integracije, dok je potpredsjednik Milan Petković naglasio da su predstavnici Republike Srpske zadovoljni pozitivnim Mišljenjem Evropske komisije. Sastanku je prisustvovao i generalni sekretar Narodne skupštine Nebojša Zgonjanin, predstavnici kabineta predsjednika i službe Narodne skupštine.



## **Čubrilović-Satler: Dobra saradnja s EU**

Predsjednik Narodne skupštine Republike Srpske Nedeljko Čubrilović razgovarao je 11. oktobra 2019. u Banjoj Luci sa šefom Delegacije Evropske unije u Bosni i Hercegovini ambasadorom Johanom Satlerom.

Predsjednik Čubrilović poželio je dobrodošlicu novoimenovanom šefu Delegacije Evropske unije u BiH i istakao da institucije Republike Srpske imaju veoma korektnu saradnju s Delegacijom Evropske unije, izražavajući uvjerenje da će ona dobra biti nastavljena.

Čubrilović je rekao da je Narodna skupština Republika Srpske jednoglasno izrazila opredijeljenost za evropske integracije, te da intenzivno radi kako bi donijela zakone i druge akte koji treba da omogućе dostizanje određenih evropskih standarda, bez obzira na to kada će BiH postati punopravna članica Evropske unije.





## Sastanak rukovodstva Narodne skupštine Republike Srpske s predstavnicima novog tvining projekta EU

### Jačanje službe parlamenta po standardima Evropske unije



Povodom početka novog tvining projekta Evropske unije pod nazivom „Unapređenje i nastavak podrške parlamentima u Bosni i Hercegovini u poslovima evropskih integracija“, vrijednog 2,3 miliona eura, predsjednik Narodne skupštine RS-a Nedeljko Čubrilović razgovarao je 16. maja 2019. s predstavnicima parlamenata Mađarske, Austrije i Hrvatske, koji su nosioci ovog projekta. Predstavnik Narodne skupštine Mađarske i rukovodilac projekta Zoltan Horvat istakao je na sastanku da je cilj novog tvining projekta jačanje kapaciteta službi Parlamentarne skupštine BiH, Narodne skupštine Republike Srpske, Parlamenta Federacije BiH, Skupštine Brčko Distrikta BiH, kao i kantonalnih skupština, u obavljanju poslova u vezi s procesom evropske integracije zemlje. „Narodna skupština Republike Srpske dat će maksimalan doprinos u realizaciji ovog projekta, kao što je to činila i ranijih godina“, kazao je Čubrilović. Predsjednik Čubrilović zahvalio se predstavnicima parlamenata Mađarske, Austrije i Hrvatske na obećanoj podršci u okviru novog tvining projekta, istakavši da je u pitanju projekat podrške EU parlamentarnim službama u BiH kojim se omogućava usvajanje najviših evropskih parlamentarnih standarda u radu. O ciljevima i planovima za realizaciju tvining projekta istog dana u parlamentu, na odvojenim sastancima, s predstavnicima projekta razgovarali su i generalni sekretar Narodne skupštine Republike Srpske Nebojša Zgonjanin, kao i zamjenik predsjednika Odbora za evropske integracije i regionalnu saradnju Aleksandar Glavaš i član

Odbora Srđan Mazalica. Generalni sekretar parlamenta istakao je da će služba parlamenta i Odsjek za evropske integracije i međunarodne aktivnosti biti posvećeni realizaciji zadataka i usvajanju preporuka novog tvining projekta.

Članovi Odbora za evropske integracije i regionalnu saradnju upoznali su predstavnike tvining projekta s aktivnostima Odbora, istakavši potrebu daljnjeg usklađivanja domaćeg zakonodavstva s pravnom tečevinom EU.



### Sastanci s ekspertima tvining projekta

Članovi Odbora za evropske integracije i regionalnu saradnju Narodne skupštine Republike Srpske održali su 1. novembra 2019. u prostorijama parlamenta sastanak s ekspertima tvining projekta Brunom Diasom Pinheirom i Laslom Juhačom. Tokom sastanka bilo je riječi o aktuelnim događajima u vezi s Mišljenjem i analitičkim izvještajem Evropske komisije, kao i sa ulogom i zadacima Odbora

u procesu evropskih integracija.

U Narodnoj skupštini Republike Srpske 6. novembra 2019. održan je zajednički sastanak Odbora za evropske integracije i regionalnu saradnju i Odbora za zaštitu okoliša s ekspertom tvining projekta Gaborom Baranjijem na kojem je razgovarano o pravnoj tečevini EU u oblasti upravljanja otpadom i zaštite okoliša.

## U Skupštini Brčko Distrikta BiH održan sastanak o novom tvining projektu Evropske unije



U Skupštini Brčko Distrikta BiH 17. maja 2019. godine održan je sastanak predsjednika Skupštine Brčko Distrikta BiH Eseda Kadrića, predsjedavajućeg Komisije za evropske integracije Uroša Vojnovića i predstavnika Stručne službe Skupštine s predstavnicima Delegacije Evropske unije u Bosni i Hercegovini, predstavnicima Narodne skupštine Mađarske i Sabora Republike Hrvatske koji zajedno s Parlamentom Austrije provode novi tvining projekat.

Zoltan Horvat, vođa tvining projekta, prezentirao je aktivnosti čije je provođenje planirano u naredna 24 mjeseca, a čiji je cilj jačanje funkcioniranja administrativnih struktura parlamenata u BiH za poslove integracija u EU, pružanje pomoći za provođenje parlamentarnih ak-

cionih planova za evropske integracije, produbljanje saradnje parlamenata BiH u pitanjima evropskih integracija, uključenost kantonalnih skupština u pitanja evropskih integracija, kao i daljnje ubrzanje i poboljšanje procesa zakonodavnog usklađivanja BiH.

Dženita Polić, predstavnica Delegacije EU u Bosni i Hercegovini, upoznala je prisutne o projektima koje provodi Delegacija s ciljem podrške parlamentima u BiH.

Predsjedavajući Komisije za evropske integracije Uroš Vojnović izrazio je zadovoljstvo novim tvining projektom i istakao da će u saradnji sa ostalim poslanicima iz Komisije učiniti sve da Skupština Brčko Distrikta BiH u potpunosti provede ovaj projekat i Akcioni plan.

## Komisija za evropske integracije razmatrala izvještaj o realizaciji Akcionog plana za provođenje mjera iz Reformske agende

Komisija za evropske integracije Skupštine Brčko Distrikta BiH održala je 16. maja 2019. godine 13. redovnu sjednicu na kojoj je razmatran izvještaj o realizaciji Akcionog plana za provođenje mjera iz Reformske agende za Bosnu i Hercegovinu za period 2015-2018, kao i lista projekata koji se finansiraju iz kreditnih i donatorskih sredstava.

Sastanku su prisustvovali šef Odjeljenja za evropske integracije, predstavnici nekoliko odjeljenja Vlade Brčko Distrikta BiH koji raspolažu sredstvima za realizaciju određenih projekata, kao i predstavnici Ureda Evropske unije i predstavnik Misije OSCE-a u Brčko Distriktu BiH.

Šef Odjeljenja za evropske integracije Vlade Brčko Distrikta BiH Miroslav Gelić izvijestio je članove Komisije o fazi provođenja mjera iz Akcionog plana i rekao da od ukupno 62 mjere status završenih ima njih 15. Kontinuirano se provodi 12 mjera, u toku je provođenje 23, za pet mjera nije započeto provođenje, a sedam mjera ima sporan status. Konstatirano je da je u odnosu na posljednji izvještaj o provođenju mjera iz Akcionog plana koji je Odjeljenje za evropske integracije podnijelo Komisiji za evropske integracije postignut određen napredak ali da, s obzirom na važnost ovog dokumenta koji obuhvata širok spektar mjera u oblastima ekonomije, socijalne zaštite, uprave i vladavine prava, procenat realiziranih mjera nije na zadovoljavajućem nivou.



Komisija je razmatrala i listu projekata koji se finansiraju iz kreditnih i donatorskih sredstava kako bi se sagledao status projekata koji su započeti, faza njihovog provođenja kao i da se predstavnici odjeljenja Vlade izjasne o tome da li su neophodna dodatna sredstva u budžetu za njihovo sufinansiranje. Konstatirano je da je već dobivena sredstva neophodno efikasnije realizirati i provoditi, kao i da Brčko Distrikt BiH treba da koristi više mogućnosti koje Evropska unija pruža kroz finansiranje i sufinansiranje raznih projekata.

Također su pozvani predstavnici svih odjeljenja da Komisiji za evropske integracije dostave zahtjeve za sredstva koja su neophodna za sufinansiranje projekata kako bi ona bila osigurana u budžetu za narednu godinu.

## Provođenje preporuka iz Akcionog plana za Skupštinu Brčko Distrikta BiH razmatrana na Komisiji za EI



Provođenje preporuka iz Akcionog plana za Skupštinu Brčko Distrikta BiH za unapređenje njene uloge u kontekstu EU integracija u sklopu tvining projekta bila je glavna tema 14. redovne sjednice Komisije za evropske integracije održane 24. septembra 2019. godine.

Tvining projekat "Osnaživanje i nastavak podrške parlamentima u BiH u poslovima evropskih integracija", koji se trenutno provodi i koji finansira Evropska unija, između ostalog, olakšava i podržava reviziju Akcionog plana za Skupštinu Brčko Distrikta BiH s ciljem jačanja njene

uloge u kontekstu evropskih integracija.

Predviđeno je da se uz saradnju eksperta tvining projekta i savjetnika za EU pitanja u Skupštini Brčko Distrikta BiH sačini ažurirana verzija Akcionog plana i da se kao takva predloži Skupštini na usvajanje. Ocijenjeno je da je redovnim praćenjem primjene Akcionog plana Komisija za evropske integracije značajno unaprijedila procenat provedenih preporuka i time pomogla napretku Skupštine Brčko Distrikta BiH u pogledu EU integracija.

## Održana konsultativna radionica o temi predstojećih poslova i izazova Komisije za evropske integracije

U okviru 15. sjednice Komisije za evropske integracije 29. oktobra 2019. godine održana je konsultativna radionica o temi predstojećih poslova i izazova ove skupštinske komisije. Radionica je organizirana u okviru EU tvining projekta "Podrška Evropske unije parlamentima u BiH u poslovima evropskih integracija", a u njenom radu učestvovali su: Bruno Dias Pinherio, stalni predstavnik portugalskog parlamenta u Evropskoj uniji, i Laslo Juhas, predsjedavajući Sekretarijata Komisije za evropske poslove, zamjenik predsjedavajućeg Odjeljenja za komisije Narodne skupštine Mađarske.

Tokom konsultativne radionice oni su s članovima Komisije za evropske integracije podijelili saznanja o najnovijem razvoju događaja u EU, ciljevima koji moraju biti dostignuti i obavezama koje moraju biti ispunjene i upoznali ih s najboljim slučajevima iz prakse komisija za evropske integracije zemalja koje su prešle put kandidature za članstvo u EU. Članovi Komisije također su razmatrali izvještaje o provođenju preporuka iz Akcionog plana za Skupštinu Brčko Distrikta BiH za unapređenje njene uloge u kontekstu EU integracija s prethodne dvije sjednice Komisije za evropske integracije.



## Najava događaja u vezi s EU u narednom tromjesečju

14. januar 2020. godine,  
Parlament Federacije Bosne i Hercegovine,  
Sarajevo

Tematska sjednica Predstavničkog doma Parlamenta Federacije Bosne i Hercegovine o temi "Ispunjavanje obaveza Bosne i Hercegovine iz Ugovora o uspostavljanju Energetske zajednice - status implementacije u Federaciji BiH".

28. januar 2020. godine,  
Evropski parlament,  
Brisel

Na poziv predsjednika Evropskog parlamenta Davida Marie Sasolia planirano je održavanje "Samita Evropskog parlamenta i predsjednika parlamenata zemalja Zapadnog Balkana".



## Leksikon termina EU

### EVROPSKI PARLAMENT

Kao jedna od prvih zajedničkih institucija, Evropski parlament nastao je stapanjem skupština Evropske zajednice za uglj i čelik, Evropske ekonomske zajednice i Evropske zajednice za atomsku energiju u jedinstvenu Skupštinu, a činili su ga delegati zakonodavnog organa država članica. Iako je njegovo osnivanje bilo potvrđeno još Rimskim ugovorima 1958. godine, prvo neposredno biranje poslanika u Evropskom parlamentu realizirano je u junu 1979. godine i od tada se izbori održavaju svakih pet godina. Broj poslaničkih mjesta za države članice određen je Osnivačkim ugovorima i njihovim revizijama te on odražava broj stanovnika država članica. Izbori se organiziraju u svakoj državi članici, a na tim izborima pravo glasa, te pravo kandidiranja imaju ne samo državljani države koja popunjava svoju kvotu nego i državljani druge države članice koji imaju prebivalište u toj državi. To je jedno od novih političkih prava koje uživaju građani Evropske unije nastalo uvođenjem instituta evropskog građanstva. U Evropskom parlamentu, čije je sjedište u Strazburu, izabrani poslanici raspoređeni su prema političkim grupama zavisno od opredjeljenja koja zastupaju. Rad Parlamenta organiziran su putem odbora čiji broj i oblasti koje pokrivaju prate oblasti nadležnosti Evropske unije. Evropski parlament ima svog predsjednika i 14 potpredsjednika te šest komesara. Osim toga, Parlament ima svoja politička tijela, a to su: Konferencija predsjednika koju čine predsjednici političkih grupa i predsjednik Evropskog parlamenta i zadužena je za organizaciju rada Parlamenta, Ured Evropskog parlamenta koji čine 14 potpredsjednika i šest komesara koji su zaduženi za unutrašnje funkcioniranje Parlamenta i komesari koji su zaduženi za administraciju i finansije. Sjedište Sekretarijata Parlamenta je u Briselu i Luksemburgu. Tri glavne uloge Evropskog parlamenta su: zakonodavna, koju dijeli s Vijećem Evropske unije i Evropskom komisijom a odnosi se na saradnju, odobravanje, zajedničko odlučivanje i konsultacije; demokratski nadzor koji provodi nad drugim institucijama Evropske unije, prvenstveno nad Evropskom komisijom, i odlučivanje o budžetu, zajedno s Vijećem Evropske unije i Evropskom komisijom. *Više informacija na:* <https://www.europarl.europa.eu/portal/en>

### EVROPSKA KOMISIJA

Kao zajednička institucija Evropske unije, Evropska komisija osnovana je Ugovorom o spajanju 1965. godine. Od tada Komisija djeluje kao političko i izvršno tijelo Evropske unije s tri osnovna zadatka: pripremanje i predlaganje propisa koje šalje drugim nadležnim tijelima (Vijeću Evropske unije i Evropskom parlamentu) na odlučivanje (pravo zakonodavne inicijative); izvršna i nadzorna ovlaštenja na osnovu kojih donosi brojne provedbene propise (smjernice, uredbe, odluke) kojima se omogućava primjena propisa Vijeća Evropske unije. Komisija ima ovlaštenje nadzora u odnosu na druge države članice time što ih može tužiti Evropskom sudu pravde za povredu osnivačkih ugovora. Osim toga, Komisija ima i važnu ulogu u vanjskoj politici Evropske unije koja se očituje u koordinaciji finansijske i tehničke pomoći državama srednje i istočne Evrope, vođenju pregovora za prijem u članstvo novih država, te kao trgovinski pregovarač Evropske unije. Članovi Evropske komisije nazivaju se komesarima i imenuju se na petogodišnji mandat, a predsjednika Evropske komisije imenuje Evropsko vijeće kvalificiranom većinom, dok njegovo imenovanje potvrđuje Evropski parlament. Predsjednik Evropske komisije u saradnji s Evropskim vijećem predlaže ostale članove Komisije, a cijelu Komisiju imenuje Evropsko vijeće nakon odobrenja Evropskog parlamenta. Evropska komisija odgovorna je Evropskom parlamentu i, u slučaju izglasavanja nepovjerenja, njeni članovi moraju podnijeti ostavku. Sjedište Evropske komisije je u Briselu, a ona ima urede i u Luksemburgu, predstavništva u svim zemljama članicama EU i delegacije u trećim zemljama. *Više informacija na:* [https://europa.eu/european-union/about-eu/institutions-bodies/european-commission\\_en](https://europa.eu/european-union/about-eu/institutions-bodies/european-commission_en)

### EVROPSKO VIJEĆE

Uspostavljeno Glavom II. Jedinistvenog evropskog akta 1986. godine, Evropsko vijeće predstavlja najviši politički organ Evropske unije. Njega čine šefovi država i vlada članica Evropske unije, generalni sekretar Vijeća i visoki predstavnik za međunarodne odnose i sigurnost, ministri vanjskih poslova Unije, predsjednik Evropskog parlamenta, predsjednik Evropske komisije, a po potrebi ministri ekonomije i finansija i drugi resorni ministri. Evropsko vijeće razmatra sva najvažnija unutrašnja i međunarodna pitanja, utvrđuje generalnu politiku Evropske unije, daje smjernice izvršnim organima Unije i utvrđuje rokove za izvršenje usaglašenih prioriteta. Predsjednik Evropskog vijeća je šef države/vlade države predsjedavajuće Vijećem Evropske unije. Evropsko vijeće sastaje se dva puta tokom zasjedanja jednog predsjedništva, odnosno četiri puta godišnje. Nakon svakog sastanka na vrhu (formalni, neformalni, konsultativni) objavljuju se zaključci predsjedništva kao zajednički dokument, ali obavezujući su samo zaključci, preporuke ili neke druge mjere donesene na formalnim sastancima. Sjedište ove institucije je u Briselu. *Više informacija na:* [https://hr.wikipedia.org/wiki/Evropsko\\_vijeće](https://hr.wikipedia.org/wiki/Evropsko_vijeće)



## VIJEĆE EVROPSKE UNIJE

Ovaj organ predstavlja *glas država* članica jer zastupa interese vlada članica, uspostavljajući tako direktnu vezu između zajedničkih i nacionalnih interesa. Vijeće Evropske unije, Vijeće ministara ili Ministarsko vijeće EU uspostavljeno je aktom iz Rima 1957. godine. Sastavljeno je od po jednog predstavnika iz svake države članice na ministarskom nivou i uvijek se sastaje u istom broju. Međutim, sastav Vijeća mijenja se u zavisnosti od teme o kojoj se na sastanku raspravlja te su u vezi s tim glavne, tematski različite, konfiguracije Vijeća: opći i vanjski poslovi; ekonomsko-finansijski poslovi; zapošljavanje, socijalna politika, zdravstvo i pitanja potrošača; konkurentnost (unutrašnje tržište, industrija i naučnoistraživački rad); transport, telekomunikacije i energetika; poljoprivreda i ribarstvo; zaštita okoliša i obrazovanje, mladi i kultura. Na osnovu strateških smjernica Evropskog vijeća i vladinih inicijativa zemalja članica, Vijeće Evropske unije brine o provođenju prioriteta EU, samostalno ili zajedno s Evropskim parlamentom utvrđuje propise i prenosi ovlaštenja na Evropsku komisiju, te usaglašava ekonomske politike država članica, a na prijedlog Evropske komisije donosi uredbe, direktive, odluke, preporuke, deklaracije ili obavezujuće zaključke i brine o njihovom izvršenju. Evropsko vijeće također zaključuje međunarodne sporazume između Evropske unije s jednom ili više država ili s međunarodnim organizacijama; zajedno s Evropskim parlamentom odobrava budžet EU te na osnovu smjernica Evropskog vijeća definira zajedničku vanjsku i sigurnosnu politiku Evropske unije. Predsjedavanje Vijećem Evropske unije prenosi se svakih šest mjeseci na onog ministra čija je zemlja polugodišnji predsjedavajući Unijom. U radu ovog vijeća pomaže Odbor stalnih predstavnika COREPER, koji imaju funkciju ambasadora država članica pri EU i Generalni sekretarijat na čijem je čelu generalni sekretar koji je istovremeno i visoki predstavnik EU za vanjsku i sigurnosnu politiku. Zasjedanja se održavaju u Briselu i u Luksemburgu. *Više informacija na:*

<http://dei.gov.ba/dokumenti/default.aspx?id=4909&langTag=bs-BA>

RADNA GRUPA ZA  
ZAPADNI BALKAN (COWEB)

Radna grupa za Zapadni Balkan je radno tijelo Evropske unije, tačnije Vijeća EU, koje djeluje na nivou eksperata država članica, ali se sastaje i na političkom nivou, npr. na nivou političkih direktora ministarstava vanjskih poslova država članica. Zadatak mu je da prati aktuelno stanje u regiji i da priprema prijedloge odluka, zaključaka, mjera i ugovora u vezi sa Zapadnim Balkanom.



